



Ե Ր Կ Շ Ա Բ Ա Թ Ա Թ Ե Ր Թ

ՀՀ Դաշնակցության Արցախի Կենտրոնական Կոմիտեի պաշտոնաթերթ

Մենք համացանցում

www.aparaj.am

## Խմբագրական

### Մեր ընտրությունը մեծ չէ

Ադրբեջանական դիվերսիայի վերջին իրադարձություններն ամբողջությամբ տեղավորվում են Ադրբեջանի ապակառուցողական քաղաքականության կուրսի շրջանակներում: Վերջինիս սադրիչ գործողությունները հատկապես Հայաստանի եւ Ադրբեջանի արտագործնախարարների հանդիպման նախաշեմին խոսում են Ադրբեջանի՝ բանակցային գործընթացն ամեն կերպ տապալելու եւ նոր իրադրություն ստեղծելու մասին: Սակայն ամբողջությամբ պարզ չէ, թե ինչ է ենթադրում այդ նոր իրադրությունը:

Մեկ բան պարզ է. եթե պետք է փոփոխություն մտցնել բանակցային գործընթացում, իսկ դա պետք է, որ մտցվի, ապա դա բանակցություններում ԼՂՀ անմիջական եւ պաշտոնական մասնակցությունն է:

Տեղի ունեցած վերջին իրադարձությունները դարաբաղա-ադրբեջանական սահմանին գրեթե աննկատ մնացին ԵԱՀԿ Մինսկի խմբի համանախագահների համար: Համենայնդեպս իրավիճակի գնահատական եւ դրանից բխող որեւէ հետեւություն չեղավ:

Վաղուց ժամանակն է նաեւ, որ հայկական կողմը լուրջ չապավինի համանախագահների եւ կամ այլոց գնահատականներին եւ «դատապարտումներին»: Ավելի քան ճանաչելով հակառակորդ կողմի յուրաքանչյուր դրսեւորումներն ու ակնկալիքները, հայկական կողմը պետք է վարի նախաձեռնողական քաղաքականություն:

Արցախի Հանրապետության միջազգային ճանաչման հարցը պետք է դառնա Հայաստանի արտաքին քաղաքականության հիմնական օրակարգային ուղղությունը:

Ադրբեջանը պարտավորված պիտի լինի գործունենա միջազգային նոր սուբյեկտի՝ քաղաքակիրթ աշխարհի կողմից ճանաչված եւ ընդունված Լեռնային Ղարաբաղի Հանրապետության հետ:

Լեռնային Ղարաբաղի Հանրապետության հռչակումը եւ նրա առկայությունը որպես այդպիսին ենթադրեց պատերազմական գործողությունների կասեցում, զինադադար եւ կանխեց մի նոր ցեղասպանություն՝ պայմանավորված վերջինիս կարելու գործոնով: Պայքարի տրամաբանական շարունակությունը հայկական կողմի համար Արցախի Հանրապետության միջազգային ճանաչումն է, ինչն էլ իր հերթին ենթադրում է տարածաշրջանում՝ Անդրկովկասում, կայուն խաղաղության հաստատում:

Կարելու է, որ հենց այս շեշտադրումը դառնա միջազգային հանրության եւ բոլոր շահագրգիռ կողմերի ուշադրության առանցքը:

Ադրբեջանի նախագահը վերջերս հնչեցրած իր ելույթներում հաճախակի է անդրադառնում «Արեւմտյան Ադրբեջանի պատմական հողերի մասին, եւ դրանով պարզ է դառնում Ադրբեջանի ներկայիս իշխանության հիվանդ նկրտումները կապված հայկական կողմի եւ նրա հետ կառուցվելիք հարաբերությունների շուրջ:

Մեզ համար մեկ բան եւս պարզ է՝ Ադրբեջանը փորձելու է վերսկսել պատերազմական գործողությունները, երբ որ պատրաստ լինի դրան: Իսկ սահմանին տեղի ունեցած վերջին իրադարձությունները համենայնդեպս ավելին մտածելու տեղիք տվեց ադրբեջանական կողմին:

Իսկ մեզ մեծ ընտրություն չի մնում՝ պետք է օր օրի գորացնել հայկական պետությունն եւ հայկական բանակը: Սա է, թերեւս, իրավիճակի փրկության միակ բանաձեւը:



## Մենք անզիջում կլինենք մեր ազգային շահերի պաշտպանության գործում

### ՀՀ Դաշնակցության Արցախի Կենտրոնական Կոմիտեի հայտարարությունը

2013թ. դեկտեմբերի 17-ին Մարդու իրավունքների Եվրոպական դատարանը իր անարդար վճռով արդարացրել է մարդու դեմ ոճրագործության իրականացման հերքումը: Փաստորեն անմեղսունակ է ճանաչվել մի հանցագործ, որը հերքում է մարդկության դեմ կատարված ոճրագործությունը, դա անվանելով «միջազգային սուտ», իսկ դրա վտանգը կրկնապատկում է այն հանգամանքը, որ այս կեցվածքը միտում ունի դառնալ նախադեպ եւ առիթ ստեղծել նոր ոճրագործությունների ընդդեմ բոլորիս՝ համայն մարդկության:

Արցախը դիմակայել է Թուրքիայի կողմից սկսված եւ Ադրբեջանի միջոցով շարունակվող ցեղասպանությանը: Ադրբեջանը դեռեւս 1920-ական թվականներին պետականորեն ծրագրված ցեղասպանություն է իրականացրել ոչ միայն Արցախում, հատկապես Կուր գետի արեւելյան հատվածում, այլ նաեւ

Նախիջեւանում: Վկան ամայացված բնակավայրերն ու ոչնչացված հարյուրավոր հայկական խաչքարերն են:

Մեր խորին համոզմամբ՝ Ադրբեջանին այս սանձարձակությունների մոլոր ժամանակին Թուրքիայի կատարած ցեղասպանության չդատապարտելն է, հատուցում չպահանջելը եւ, վերջին հաշվով, միջազգային հանրության կողմից այդ անմարդկային եւ վայրագ քաղաքականության շարունակության փաստացի հովանավորումը: Մեր ժողովրդի համառ Վճռական պայքարի շնորհիվ մեր հայրերի, ընկերների, զավակների արյան գեղով մենք կանխեցինք ցեղասպանության նոր ալիքը եւ կերտեցինք մեր Ազատ ու Անկախ երկիրը՝ Լեռնային Ղարաբաղի Հանրապետությունը:

Մեր համոզմամբ՝ Եվրոպական դատարանի այս որոշումը նախ եւ առաջ հարցականի տակ է առնում Շվեյցարիայի արդարամիտ օրենսդ-


րությունը, որը քրեորեն պատժելի արարք է համարում մարդկության դեմ ոճիրները, ներառյալ Հայոց Զեղասպանության ժխտումը:

Մարդու իրավունքների Եվրոպական դատարանի վճռի անփոփոխ մնալը մեծ հարված է հայ ժողովրդի իրավունքների վերականգնման գործին, այդ թվում՝ Հայոց Զեղասպանության ճանաչման միջազգային ճիգերին:

Բարձր ատյանների հակամարդկային որոշումները ծնում են նոր ոճրագործություններ: Դրա վկայությունն է վերջին օրերին դարաբաղա-ադրբեջանական սահմանում ադրբեջանական կողմի ագրեսիվ քայլերը, որոնց հետեւանքով նորից թափվեց անմեղ արյուն: Մենք անզիջում կլինենք մեր ազգային շահերի պաշտպանության գործում:

ՀՀ Դաշնակցության Արցախի Կենտրոնական Կոմիտեի

## Լուս Անջելոյն ճանաչել է Արցախի անկախությունը



Միացյալ Նահանգների հայ համայնքի ներկայացուցիչների եւ ՀՀ Դաշնակցության աշխատանքների շնորհիվ ԱՄՆ-ում սկսված՝ Լեռնային Ղարաբաղի Հանրապետության ճանաչմանը սատարող բանաձեւերի շարքը հաճախակի են համալրվում:

Կարդացեք 2-րդ էջում

## Հերոսի մեծարում Ստեփանակերտում



Հունվարի 22-ի կեսօրին Ստեփանակերտի Սուրբ Հակոբ եկեղեցու բակը մարդաշատ էր: Մի քանի հազար մարդ հանաքվել էին հունվարի 19-ին Ղարաբաղ-ադրբեջանական սահմանին ադրբեջանական զինուժի իրականացրած դիվերսիոն հարձակման հետեւանքով զոհված կրտսեր սերժանտ Արմեն Հովհաննիսյանի հիշատակը հարգելու համար կազմակերպված հոգեհանգստի արարողությանը եւ մոմավառությանը:

Կարդացեք 7-րդ էջում













Մի՛ մոռացեք...

Յակովին բոլորը գիտեն: Նրան ճանաչում են ոչ միայն հայրենի Մեծ Թաղեր գյուղում, այլև շրջանում ու ողջ հանրապետությունում: Արցախյան շարժման ակտիվիստներից է, «Մարտական խաչ» երկրորդ աստիճանի շքանշանակիր:

Առաջին կարգի հաշմանդամ է: Այր, առաջին կարգի հաշմանդամ էրկու ոտքը չկա, բայց այսօր էլ չի կորցրել ոգու կորովը, քարշ չի գալիս կյանքի պոչից, քանզի «գլուխ պահել» չի սիրում: Այսօր էլ մեր կողքին է, մեր շրջապատում, ապրում է գյուղի հոգսերով և ուրախություններով, մասնակցում հարսանեկան հանդեսներին, սգո արարողություններին:

Ծնվել է 1966 թվականին: 1983-ին ավարտել է միջնակարգը և նույն տարում ընդունվել Երեւանի հիդրոմեխանիկ տեխնիկումը: Մեկ տարի սովորելուց հետո գորակոչվել է Նախկին Խորհրդային Միության բանակի շարքերը, ծառայել շինգումարտակում: Չորսըստից հետո շարունակել է ուսումը և 1987թ. տեխնիկումն ավարտել գերազանցության դիպլոմով:

Հետո եկել է գյուղ, Նախկին խաղողագործական սովխոզում որոշ ժամանակ աշխատել իբրև բանվոր, ապա դարձել չորրորդ բրիգադի բրիգադավար: 87-ի վերջերից հազար ու մի թելերով կապված էր Ե՛ւ հանրային արտադրության, հայրենի հողի, Ե՛ւ նոր-նոր խմորվող Ղարաբաղյան շարժման լիդերների՝ Արթուր Մկրտչյանի, Էմիլ Աբրահամյանի, Լյովա Հայրիյանի, Էլի ուրիշների հետ:

1989-ին ընդունվել է Երեւանի գյուղատնտեսական ինստիտուտի տնտեսագիտական բաժինը: Չի ավարտել, պատերազմը խանգարել է: Վերավորվելուց հետո ուսումը տեղափոխել է Արցախի պետական համալսարան, որն էլ ավարտել է 2001 թվականին:

1995-ին ամուսնացել է համագյուղացի Իննա Միրզախանյանի հետ: Հիմա երեք երեխաների հայր է: Ավագը՝ Մարիամը, սովորում է 7-րդ դասարանում, միջնակց՝ Գրիգորին՝ 5-րդում, իսկ կրտսերը՝ Աննան, ընդամենը մեկ տարեկան է:

Շտապենք ասել, որ 89-ից դիրքերում էր: Որսորդական հրացանով հերթապահության էր գնում: Գնում էր իր բրիգադի անդամների հետ նաեւ օգնում, օժանդակում կամավորական առաջին ջոկատների ստեղծմանը: 92-ին նաեւ կամավորական վաշտի ճանաչված անդամներից էր: Նրա հետ էին Բորիկ Աբազյանը, Օլեգ Գյոզալյանը, Ռոբերտ Պողոսյանը, Խաչիկ Ասրյանը, ուրիշներ: Առաջին մարտն ընդունել է նույն թվականի հունիսի 28-ին «Կարվինի» մոտ: Այդ օրը Արթուր Բեջանյանը վիրավոր-

վել է, Էդիկ Հայրիյանը՝ զոհվել:

Հետո մասնակցել է Դրախտիկի դիրքերի ետգրավմանը, կռվել Խուռհատ կոչվող տեղամասում, Բանգուրի, Ջերայիլի կողմերում: Ապա դասընթացներ է անցել գեներալ Իվանյանի ստեղծած հրետանու ռազմական կենտրոնում: Նրա հետ էին համագյուղացիներ Գարիկ Դադասյանը, Էդիկ և Լյովա Փաթյանները և ուրիշներ: Ի դեպ, բոլորը ստացել են անհրաժեշտ որակավորում ու դարձել հրետանու հետախույզներ: Որպես ուղորդիչ, որպես հրետանավոր՝ աչքի է ընկել Ղաջարի, Գյումշաթաղի, Շահարվի համար մղված թե՛ մարտերում՝ թշնամուց առգրավելով երկու թև-



դանոթ, գեղքի այլ տեսակներ: Դա եղել է 1993-ի ապրիլի հինգին, վեցին:

Նույն տարվա օգոստոսին Յակովին, իբրև փորձառու մարտիկ-ուղորդիչի, կանչել են Հաղորթ: Նրան և Արմեն Աբրահամյանին, Դավիթ Մուխանյանին, Էդիկ Փաթյանին կարելու առաջադրանք է տրվել՝ հայտնաբերել թշնամու կրակակետերն ու դիրքերը:

Օգոստոսի 16-ին տղաների հետ բարձրացել է «Խուռհատի թումբը», տեղադրել անհրաժեշտ սարքավորումները, կապի միջոցները, ամեն ինչ բերել մարտական պատրաստության վիճակի՝ հակառակորդին շժմեցուցիչ հարված հասցնելու համար: Սակայն օգոստոսի 18-ին, առավոտյան ժամը 6-ին տեղի է ունեցել անսպասելի, անկանխատեսելի, սարսափելի դեպք: Ետգրավված դիրքում, ականի պայթյունից մի քանի տեղից Յակովը ծանր վիրավորվել է: Անասելի ծանր վիճակում հասցրել են Հաղորթ, որտեղ վիրահատել են երկու ոտքը՝ ծնկից վերել: Նույն օրը ուղղաթիռով տեղափոխել են Երեւան: Այստեղ ավելի քան տասը ամիս բուժվել է, այնուհետև կատարել են ոտքերի պրոթեզավորում՝ նոր շունչ ու կենդանություն տալով ազատամարտիկին:

Արցախի, մայր հողի, մարտական ընկերների ու ծնողների կարոտով ապրող գինվորը ամիսներ հետո տուն է դարձել՝ վերքերը դեռ լրիվ չսպիացած, բայց հույսը, հաղթանակի հավատը դեռ հոգու խորքում ամուր պահած:

Ու նա տեսավ այդ հաղթանակը: Տեսավ և ուրախացավ, հպարտացավ, քանզի ինքն էլ բաժին ուներ հաղթանակի ձեռքբերման, կոփման գործում:

Իբրև հավելում այս ամենի՝ շեշտենք, որ այս տեղեկությունները, թե խոսուն են, բայց, թերևս, լրիվ չեն բնութագրում Յակովին: Վերջինիս մասին կարելի է խոսել օրերով:

Ճիշտ է՝ գովեստի, դրվատանքի խոսք

Սովորություն չունի: Իր հանգիստը նա աշխատանքի մեջ է տեսնում: Օրը բացվում է թե չէ՝ նա իր «Սենասի» դեկին է (կառավարումը ձեռքով է): Կատակ բան չէ՝ տնտեսություն է վարում, հազար ու մի գործ անում: Հիմա կասեք՝ ինչպես: Բարեկամները, ընկերները օգնում են: Ինքն էլ պարտքի տակ չի մնում: Ավելին. մեկ-մեկ սատար է կանգնում Երեւանում ապրող ավագ եղբորը՝ Վադոյին, օգնության ձեռք մեկնում հինգ քույրերին, որոնք բոլորն էլ իրենց ընտանիքներն ունեն, իրենց հայկական օջախները: Օգնում, աջակցում է՝ ինչով կարողանում է. Թեկուզ՝ մի բարի խոսքով, խորհրդով՝ միշտ հիշելով մոր խրատը, մոր վերջին խորհուրդ-պատգամը:

«Իմացեք, հա, օջախի գորությունը, օջախի ամրությունը քույր ու եղբայրների, հարազատների, բարեկամների սերունդան մեջ է...»

Յակովը չի մոռանում հանգուցյալ մոր՝ Պուժժի խոսքը: Չի մոռանում, և տոնական օրերին, իրենց մեծ գերդաստանի համար հիշարժան օրերին, ամեն պատեհ առիթով եղբայրներով ու քույրերով, հարազատներով (նշեմ, որ հայրը՝ Գրիգորն էլ, վերջերս է մահացել) նշում են սեղանի շուրջ, զրուցում, ասում, խոսում, ուտում, խմում, վերհիշում այն ահավոր օրերը, պլաններ կազմում, ծրագրեր մշակում: Իսկ երբ քույրերից մեկը նայում է նրա հատված ոտքերին, խորը ախ քաշում, հառաչում ու բոլորից աննկատ թաշտիսակը սեղմում աչքերին, Յակովը փոքր-ինչ հուզված, մի քիչ էլ վրդովված՝ ասում է. «Հայրենի հողի համար, հայրենի ջրի համար հազարավոր հայորդիներ զրկվել են ոչ միայն ոտքից, այլև կյանքից... Այս ամենը մի մոռացեք ու փառք տվեք Տիրոջը, որ ողջ եմ մնացել»:

Այսպես է դատում, այսպես է իր ցավը, անբուժելի վերքը մեղմում ու քույրերի, մտերիների, տնեցիների դեմքից տխրությունը վանում տակավին երիտասարդ (45-ը նոր է բոլորել) Յակով Ալթունյանը, որին, կարծում եմ, շատ են պատշաճում մեծ հայրենասեր ու հայրենապաշտ, զորավար Գարեգին Նժդեհի խորհմաստ բառերը:

«Քաջի ամենագեղեցիկ զարդը կռվի դաշտում ստացած վերքն է»:

Միքայել ԲԱԼՅԱՆ

ՑԱՎԱԿՑԱԿԱՆ

Կուսակցական ընկեր Դավիթ Առստամյանի կնոջ մահվան կապակցությամբ՝ ՀՀԴ Արցախի ԿԿ-ն, Արցախի կառույցի կողմից ցավակցում է ընկեր Դավիթ Առստամյանին, ընտանիքին և հարազատներին: